

PABLONĒAN TIMOTEO A PAIN BUÁNMIA QUIRICA

Pablonĕan Timoteo quirica cuĕnĕoxuan

¹ 'Ēx cana Pablo, aín bana uni ñuixunuan Jesu-
cristonĕn caísa 'ain. Usa 'inun ca Nucĕn Papa
Dios, an nu ainan 'inun iĕmicĕ, abĕtan Jesu-
cristo, an nu asaribi 'iminunu nun caíncĕ an
mĕnócĕxa. ² Timoteo, 'ĕn cana ĕnĕ quirica mi
buánmin. 'Ēx ami sináncĕsaribi oi mix Jesucristomi
sináncĕ 'aish camina 'ĕn bĕchicĕsa 'ain. Nucĕn
Papa Dios 'imainun Nucĕn 'Ibu Jesucristo, an nu
ainan 'inun iĕmicĕ, an nuibaquin min 'uchacama
tĕrĕncĕ cupími ainan 'aish chuámarua 'iti cana
cuĕĕnin.

Unin cĕmĕquin ñuicĕ bana cuatima bana

³ 'Ēx Macedonia menu cuantámainunmi Efeso
ĕmanu bĕrúnun quixun cana mi can, anuxunmi an
Nucĕn Papa Dios cuĕĕncĕsabi oquin 'unánmiquinma
bĕtsi bana uni ñuixuncĕ unicama usoquin 'ax-
unma 'anun quixun canun. ⁴ Usa 'ain camina
a unicama cati 'ain, uni raírĕnĕan nun rara tsóa
'imainun uisai cara nun rara 'iacĕxa quixun ñuicĕ
banacama a cuaxunma 'anun quixun. Usa ba-
nacama cuati ca uni ñancábi cuĕbicanania. Usa 'ain
ca an a banacama ñuicĕ unicaman Jesucristomi
catamĕquin Nucĕn Papa Dios cuĕĕncĕsabi oquin
'anun nu 'aquinima.

⁵ Nucën Papa Dios ca cuëënia aín unicamaxa ësai 'inúnu 'unánmiti: aín nuitu upí 'ianan aín 'uchacama tërécë 'ixun 'atëcënti sináncëma 'ianan Jesucristomi asérabi catamëcë 'ixun unicama nuibati. ⁶ Usaía 'inun 'unánminun ca Nucën Papa Dios cuëënia quixun sinanima ca bëtsi bëtsi uní amanu amanua sinani banaía. Usa 'ixun ca Nucën Papa Dios cuëëncësabi oía 'inun aín unicama 'aquinima. ⁷ Nucën Papa Diosan bana unicama 'unánmisa tanquin ñuixunquinbi ca a bana —uisai cara quia —quixun cuatima. 'Imainun ca a ñuixuncë banacama —asérabi ca usa 'icë —quixun ñuixunquinbi uisai quicë cara quixun a bana anbi cuatima.

⁸ Camabi unia upí 'iti oquin ca Nucën Papa Diosan aín bana uní 'ináncëxa. Usa 'ain ca a bana quicësabi oi 'iquin unin 'unánti 'icën, a banax ca upíira upí 'icë quixun. ⁹ Cananuna 'unanin, aín nuitu upí 'ixun ca unin usai ca uní 'itima 'icë quixun cuënëo bana isquinmabi ñu 'aisama 'aima. 'Aínbi ca an ësa ñu 'acë unican —usaquin 'ati ca 'aisama 'icë —quixun 'unánti cuënëo ca a bana 'icën: an Nucën Papa Diosan bana cuëëncëma, 'imainun an aín bana tancëma, 'atima 'aish 'aisama sinánñu, 'uchañuira, an Nucën Papa Diosmi racuëquinma aín bana quicësabi oquin 'acëma, 'imainun an aín papa 'acë, an aín tita 'acë, an uni itsi 'acë, acama 'imainun, ¹⁰ aín xanuma 'aínbi xanubë 'icë unicama, aín bënëma 'aínbi unibë 'icë xanucama, xanúxmabi unibë 'icë unicama, an ñu mëcamacë unicama, cëmëcë unicama, axa anun Nucën Papa Diosbë upí 'iti bana, ënéxa quicë ñucama cuëëncëma unicama. Ësa ñu 'acë unican —usai 'iti ca 'aisama 'icë —quixun 'unánun ca

Nucën Papa Diosan uni aín bana 'ináncëxa. ¹¹ Axa usa ñu 'atí ca 'aisama 'icë quicë bana, usaribiti ca Jesucristo ñui quicë bana, a uni ñuixunuan Nucën Papa Diosan 'ë caíscë, ax quia.

Nuibaquian ainan 'imicëxun unin Nucën Papa Dios –asábi ca –cati bana

¹² Nucën 'Ibu Jesucristonën ca 'ën an cacësabi oquin 'atí 'unánxun, aín bana ñuixunun caxun, usoquin 'anun 'ë cushioxa. Usa 'ain cana a ñucama sinánquin –asábi ca –quixun a cain. ¹³ Jesús ñui 'atimati bananan 'atimaquin sinánquin aín unicama tēmëramianan 'atimaquin ñuia 'icëbi ca 'ë aín uni 'imiacëxa. 'Ëx Jesucristomi catamëcëma pan 'ianan ax ca Nucën Papa Diosan Bëchicë 'icë quixun 'unáncëma 'ixun usoquin 'a 'icë ca Nucën Papa Diosan nuibaquin 'ën 'uchacama 'ë tērënxuancëxa. ¹⁴ Tērënxuanan ca Cristo Jesúsnan 'aish abë achúshi sinánñushi 'ixun, unicama upí oquin nuibanan upiti ami sinánun 'imiquin Nucën 'Ibu Diosan 'ë cushioxa.

¹⁵ Ënë banax ca asérábi 'icën. Usa 'ain ca camabi unin –asérábi ca –quixun 'unánti 'icën: Camabi uni aín ñu 'aisama 'acë cupía tēmëрати 'icëbi Nucën Papa Diosnan 'inun iëminux ca Cristo Jesús ënë menu uacëxa. Uni itsi 'icësamairai 'uchacë 'icëbi ca ainan 'inun 'ë iëmiacëxa. ¹⁶ 'Ëx 'uchañuira 'icëbia Jesucristonën 'ëmi nishquinma ainan 'ë 'imicë cupí ca axa ami catamëti xënibua 'aínbi Nucën Papa Diosbë 'iti unicaman 'unánti 'icën, usaribi oquin ca Jesucristonën aribi Nucën Papa Diosnan 'inun 'imiti 'icë quixun. Atúan usaquin 'unánun ca Nucën Papa Diosan nuibaquin 'ë ainan 'imiacëxa. ¹⁷ Usa 'ain cananuna Nucën Papa Dios, axa usabi 'Apuira

'iá 'aish cēñútimoi usabi 'iti, a unin aín bērúnbi iscēma, 'ianan an camabi ñu 'unáncē, axēshia Dios, a xēnibua 'aínbi rabiti 'ain. Usai ca 'iti 'icēn.

¹⁸ Timoteo, 'ēn bēchicēsa 'icē, cana mi cain, Nucēn Papa Diosan sinánmicēx ca aín unicama mi ñui quiacēxa, —Timoteonēx upí 'ixun ca Nucēn Papa Diosan bana unicama ñuixunti 'icēn. Mi ñuia usai quicē unicaman bana sinánquin camina ami catamēquin, Jesucristo cuēēncēma ñu 'aquinma 'aisama ñu 'ati sinánquinbi tēnēquin upí ñuishi 'ati 'ain. ¹⁹ Usa 'aínbi ca —ēsa ñu 'ati ca 'aisama 'icē —quixun 'unánquinbi usaquin 'acē 'aish uni raíri Jesucristobē upíti nitsima. ²⁰ Usai ca Himeneo 'imainun Alejandro 'iata. A uni rabē cana Nucēn Papa Dios ñui 'atimati banatēcēnunma ñunshin 'ati-manēn 'apu Satanasnēan tēmēraminun ēan.

2

Camabi uni Nucēn Papa Dios ñucáxunti bana

¹ Ēnē ñucama pain ñuiquin cana mi cain: Timoteo, min camina axa Jesucristomi catamēcē unicaman, uni raíri upíti bucunun 'imianan aín cuēēncē ñuribi bianan ami catamēanuan sinánminun, Nucēn Papa Dios ñucáxunun 'ē caxunti 'ain. Canan camina atúan Nucēn Papa Dios —asábi ca —quixun canun cati 'ain. ² Usonan ca camabi nētēnu 'icē 'apucama 'imainun 'apun anēcē unicamaribi Nucēn Papa Dios ñucáxunti 'icēn, nuxnu upí sinánñu 'ianan ubíonananima chuámashirua 'aish ax cuēēncēsabi oi 'i bucunun. ³ Usoquin Nucēn Papa Dios camabi uni ñucáxunti ca asábi 'icēn. Nucēn Papa Dios, an nu ainan 'inun iēmícē, ax ca usoquian aín unicaman 'ati cuēēnia. ⁴ Ax ca

camabi unían ainan 'inux iëquin ax cuëncësabi oi 'iti 'unánti cuëënia. ⁵ Nucën Papa Dios ax ca achúshishi 'icën. An abëa camabi uni upí 'inun 'imiti axribi ca achúshishi 'icën, a uni ca Jesucristo ax 'icën. ⁶ Camabi uníxa aín 'ucha tērēncē 'aish Nucën Papa Diosnan 'inun ca 'itsianxmabi bamacëxa. Usai ca 'iacëxa quixun ca aín unicaman Nucën Papa Diosan mēníosabi oquin unicama ñuixunia. ⁷ Usa 'ain cana an 'imicē 'ixun judíos unicamaishima judíosma unicamaribi Jesucristomi catamētía Nucën Papa Dios cuëncësabi oi 'inun 'unánmin. Usaquin uni 'unánminun ca Nucën Papa Diosan 'ë caísacëxa quixun ñuixunquin cana Cristonan 'ixun cēmëquin paránquinma mi can.

⁸ Ësa cana 'ëx cuëënin, uinu cara axa Jesucristomi catamēcē unicama timētía anuax ca nucē bēnē unix upí oquin sinani, unimi nishi abē cuëbicananima, aín mēcën manámi oi Nucën Papa Diosbē banati 'icën. ⁹ Usaribiti ca axa Jesucristomi catamēcē xanucamaxribi ax tanxëshi mēnócati 'icën, 'aisamaira cupícē ñu, chupa, curi, 'imainun perla, acama ca pañutima 'icën. Aín buribi ca unin isnun quixun 'aisamaira oquin mēnótima 'icën. ¹⁰ Usai 'iquinma ca uisoquin cara axa Nucën Papa Diosmi catamēti ami cushicē xanun ñu 'ati 'icē, usoquinshi aín nuitu upí 'ixun 'anan nuibaquin 'aquinsa 'icē raíri 'aquinti 'icën. ¹¹ Axa Jesucristomi catamēcē unicama timēcē 'ain ca xanuxun banaquinma nucē bēnē unían Nucën Papa Diosan bana ñuixunia cuaquin, a banaxa quicësabi oquin 'ati sinánti 'icën. ¹² Cana mi cain, axa Jesucristomi catamēcē unicama timēcēbētan ca xanuxun bana ñuixuntima 'icën, nucē bēnē

unían aín bana tanquin an cacësabi oquin 'anun quiax ca quitima 'icën. Usai 'ianan ca unían Nucën Papa Diosan bana ñuixuncëbë banatima 'icën. ¹³ Nucën Papa Diosan ca uni achúshi, Adán, a pain uniotancëxun xanu achúshi, Eva, aribi uniocëxa. ¹⁴ Uniocëbi ca ñunshin 'atimanën 'apúan sinánmicëxun runun Adánma, Eva paránquin ñu 'atima 'amiacëxa. Usocëx ca 'uchacëxa. ¹⁵ Usa 'ainbi ca uinu 'icë xanun cara tuáñu 'ianan Jesucristomi catamëcë 'ixun, bëtsibë nuibananquin upí sinánñu 'ixun 'atima ñu sinánquinma, tuáñu xanúan 'ati ñucama upí oquin 'aia, a xanux Nucën Papa Diosan upí oquin 'aquincë 'iti 'icën.

3

Axa Jesucristomi catamëcë unin cushicamaxa usai 'iti bana

¹ Ënë bana ca asérabi 'icën: Axa Jesucristomi catamëcë unicaman cushi 'iisa tancë uni an ca 'unánti 'icën, ënë ñu mëëti ca upíra 'icën. —Usa 'ain cana upíra oquin 'ati 'ai —quixun sinánti 'icën. ² Usa 'ain ca axa Jesucristomi catamëcë unicaman cushi ax ësa uni 'iti 'icën: Ca 'iti 'icën, —'aisama ca —quixun unin ñuicëma, xanu achúshiñuishi, upí sinánñu, cuaibë banacëma, upí oquin sináncë 'ixun ñu 'atima 'acëma. 'Ianan ca a isi aia cuëenquin uni bicë 'ianan Nucën Papa Diosan bana 'unánmiti 'unáncë 'iti 'icën. ³ Paëncëma 'ianan ca unibë mëëananti sinánñuma 'iti 'icën. Usa 'aish ca bënëtima cuëmëninishi unibë bananan curíquiñu 'iisa tani bënëtima 'icën. ⁴ Aín xubunu 'icë aín aintsicamaxa upí 'inun bërúanti ca 'unánti 'icën. An upí oquin 'unánmicëxuan aín bëchicënën aín

bana cuacë ca 'iti 'icën. ⁵ Aín xubunu 'icë aín aintsicama upí 'inun bërúanti 'unáncëma 'ixun ca unin axa Jesucristomi catamëcë unicama upí 'inun bërúantima 'icën. ⁶ Bëríratsu ami catamëcë uni ax ca axa Jesucristomi catamëcë unicaman cushi 'itima 'icën. Usa 'ixunbi ca —'ëx cana bëtsi unisamaira 'ai —quixun sinánti 'icën. Usaribiquin rabíquin —'ëx cana Nucën Papa Diosaribi 'ai —quixun sináncë cupí ca Nucën Papa Diosan ñunshin 'atimanën 'apu, Satanás, aín nëtënu chiquíancëxa. Usaribítia rabíti rabanana camina axa bëríratsu ami catamëcë uni axa Jesucristomi catamëcë unicaman cushi 'imitima 'ain. ⁷ Axa Jesucristomi catamëcë unicaman cushi ax ca axa Jesúsni sináncëma unímbia —ax ca upí nuituñu 'icë —quixun 'unáncë 'iti 'icën. Usama 'icë ca unia a ñui 'atimati banamainun ñunshin 'atimanën 'apúnribi ñu 'atima 'amiti 'icën.

An axa Jesucristomi catamëcë unicama 'aquincë unicomaxa usai 'iti bana

⁸ Axa Jesucristomi catamëcë unicaman cushi 'icësaribiti ca an atu 'aquincë unicomáxribi 'iti 'icën. Upí uni ca quixuan unin 'unáncë ca 'iti 'icën. 'Ianan ca cëmëma 'ixun aín quicësabi oquin ñu 'acë 'iti 'icën. Paëncëma 'ianan ca curíqui binuxun uni paráncëma 'iti 'icën. ⁹ Usa 'ixun ca Jesucristomi catamëquin Nucën Papa Diosan Bëru Ñunshin Upitan 'unánmicë ñucama upí oquin 'unani an 'imicësabi oi 'iti 'icën. Usai 'i ca —'ën cana Nucën Papa Dios cuëëncëma ñu 'aima —quixun 'unáncë 'iti 'icën. ¹⁰ An axa Jesucristomi catamëcë unicama 'aquinti uni caísnuxun camina uisa uni cara, uisoquin cara ñu 'aia quixun pain istancëxun caísti 'ain. ¹¹ An axa Jesucristomi catamëcë unicama 'aquincë unin

xanux ca –upí xanu ca –quixuan camabi unin 'unáncë 'iti 'icën, ca cëmëi bëtsimi manáncëma 'iti 'icën, paëncëma 'ianan ca aín ñu 'ati upí oquin 'acë 'iti 'icën. ¹² An axa Jesucristomi catamëcë unicama 'aquincë unix ca achúshi xanuñuishi 'iti 'icën. Aín bëchicë 'imainun aín xubunu 'icë aín aintsicama upí 'inun bërúanti ca 'unánti 'icën. ¹³ Usa uni 'ixuan axa Jesucristomi catamëcë unicama upí oquin 'aquinia isquin ca camabi unin –atux ca upí uni 'icë –quixun ñuisti 'icën. Usaquian ñuicëxun ca ami cushicë 'aish racuéquinma Cristo Jesús unicama ñuixunti 'icën.

*Uni itsínma axa Jesucristomi catamëcë unica-
mainshi 'unáncë bana*

¹⁴⁻¹⁵ 'Ën cana bënëtishi mi isi cuanti sinanin. Usa 'ixunbi cana 'ëx bënëquiancëbëtanmamí, usaí ca Jesucristomi catamëcë unicama bucuti 'icë quixun 'unánun, quirica pan mi buánmin. Axa Jesucristomi catamëcë unicamax ca Nucën Papa Dios, axa bamatimoi tsócë, aín uni 'icën. Aín unicama cupíshi ca camabi unin uisa cara Nucën Papa Dios 'icë quixun 'unánan uisax cara uni ainan 'iti 'icë quixun 'unánti 'icën. Atu cupíshi ca bëtsi unicaman ënë ñucamax ca aséribi 'icë quixun manutima 'icën. ¹⁶ Aséribia unin 'unáncëma ñu Nucën Papa Diosan aín unicamaishi 'unánmicë 'ain ca nun ñuicë bana ënëx aséribi 'icën:

Jesucristo ax ca Diosribi 'aish ënë menuax uni 'iacëxa. Jesucristonën ca aín nuitu upí 'ixun upí ñuishi 'aia quixun ca Nucën Papa Diosan Bëru Ñunshin Upitan unicama sinánmiacëxa. 'Imainun ca Jesucristonëx ángelnëribia iscë 'iacëxa. Usa 'ain ca a ñuiquin aín unicaman

camabi menuxun uni 'unánmia. A ñuicē banax ca asérabi 'icē quixun sinani ca camabi menuax, uni ami catamētia. Usa 'aish ca ēnē menu 'itancēx aín Papabē 'i aín nētēnu cuancēxa.

4

An Nucēn Papa Diosan banamabi bana itsi uni ñuixuncē uni ñuicē bana

¹ Nucēn Papa Diosan Bēru Ñunshin Upitan ca nu upí oquin 'unánun 'unánmia, Jesucristo utēcēnti nētē 'urama 'ain ca ñunshin 'atima, an uni paráncē, acaman sinananmicēxun, uni raírínēn 'atima ñu 'aquin Jesucristomi catamēti ēnti 'icē quixun. ²Usai 'iquin ca axa cēmēcē unin bana cuati 'icēn. A cēmēcē unicama an ca cēmēntapun 'aish cēmēquin, usai banati ca 'aisama 'icē quixun 'unaníma. Usa unicamax ca aránpi 'itsisan mēpēpēcacēxa mocēnu ñun naxcacēxunbia paē tancēma unisaribi 'icēn. ³A unicamax ca axa Nucēn Papa Diosmi catamēcē unicaman isa xanu bitima 'icē quianan bētsi bētsi ñuribi pitima 'icē quiax quia, an 'ináncēxun aín unicama an aín bana 'unáncē 'ixun a —asábi ca —caquin piti oquian camabi ñu Nucēn Papa Diosan unio 'aínbi. ⁴Nucēn Papa Diosan unio camabi ñux ca upí 'icēn. Usa 'ain ca aín unicaman —pitima ca —quixun timaquinma Nucēn Papa Dios —asábi ca —caquin piti 'icēn. ⁵Aín banaxa —asábi ca camabi piti ñu 'icē —quiax quicē cupí cananuna an nu ñu 'ináncēxun, Nucēn Papa Dios —asábi ca —quixun caquin piti 'ain.

An Jesucristo cuēñcēsabi oquin bana ñuixuncē uni ñuicē bana

6 'Ēn mi cacē bana ěnē axa Jesucristomi catamēcē unicama ñuixuncē 'aish camina an Jesucristo cuēēncēsabi oquin bana ñuixuncē 'iti 'ain. 'Ianan camina ami ñuixuncē bana upí oquin 'unánquin a banaxa quicēsabi oquin 'ati 'ain. 7 Usai 'iquin camina unían aín rara usai 'iá bana ñuicēbētanbi, usaribi oquin 'aquinma, upíira oquin sinánquin Nucēn Papa Dios quicēsabi oquin 'ati 'ain. 8 Ēnēx ca ěsa 'icēn. Camabi nētēn cuai aín nami bachura 'ianan cushi 'aish ca uní upíti cuai cuēēnia. Usai cuēēncēsamaira oi ca camabi nētēn upíira oquin sinánquin Nucēn Papa Dios cuēēncēsabi oquin 'ai, uní ěnē menuax upitax bucuí cuēēanan usai 'itancēx Nucēn Papa Diosan nētēnuaxribi abē 'aish cuēēnti 'icēn. 9 Usai ca 'iti 'icē quicē banax ca asérabi 'icēn. Usa ca quixun ca camabi unin upí oquin 'unánti 'icēn. 10 Nucēn Papa Dios, axa bamatimoi tsócē, an camabi uní ainan 'inun iēmisa tanquin Jesucristomia ax catamēcē unicama iēmícē, an ca axa quicēsabi oquin ěnē menuxun 'imianan aín nētēnuxunribi aín unicama upitax 'inun 'imiti 'icē quixun cananuna 'unanin. Usa 'ixun cananuna nun 'acēsaribi oquian camabi unin 'unánun, tēmēranan uní numi 'atimati banacē 'ixunbi unicama Nucēn Papa Diosan bana ñuixunin.

11 'Ēn mi cacē banacama ěnē camina axa Jesucristomi catamēcē unicama usaquian 'anun quixun caquin 'unánmiti 'ain. 12 Usoquin 'anan camina mīx mēcó unima cupía unin timaquin min bana cuaisama tanti rabanan upí uní 'iti 'ain. Mīxmi 'icēsaribitia axa Jesucristomi catamēcē unicamaxribi upí 'inun camina upíti

bananan, upitishi 'ianan, unicama nuibanan, uisa ñu cara 'icëbëbi Jesucristomi catamëanan, min xanuma 'ain xanubë 'itima 'ain. ¹³ 'Ëx mi isi cuanmainun camina axa Jesucristomi catamëcë unicama timëcëñuxun Nucën Papa Diosan bana, min 'acësabi oquin camaxunbia cuanun cushin banaquin 'ati 'ain. Atúxa upiti Jesucristomi catamënun camina bana ñuixunquin upí oquin sinánmiti 'ain. ¹⁴ Axa Jesucristomi catamëcë unicamaxa timëcë 'aían atun cushicaman aín mecën minu nanxun, Nucën Papa Diosan sinánmicëxun mi cá bana a camina manutima 'ain. Atúan cacësabi oquinmi 'anun ca Nucën Papa Diosan mi cushioti 'icën.

¹⁵ —An ca Jesucristomi catamëcë 'ixun, upí oquin ñu 'aia —quixuan unicaman mi isnun camina upí oquin sinánquin 'ën mi cacë banacama quicësabi oquin ënquinma 'ati 'ain. ¹⁶ Amanu amanua sinanima camina a bana quicësabi oi 'ianan a banaxa quicësabi oquin uni bana ñuixunti 'ain. Usaquin 'aími mix iëcë 'imainun ca an mínmi a bana ñuixuncëxun cuacë unicamaxribi Nucën Papa Diosnan 'inux iëcë 'iti 'icën.

5

Axa Jesucristomi catamëcë unicamabë usai 'iti bana

¹ Uni apan camina ñu catima 'ain. Ñu caquinma camina min papami 'acësaribi oquin uni apan upí banaishi ñuixunquin 'ësëti 'ain. Min xucënmi 'acësaribiquin camina bënëá unicamaribi nuibaquin 'ësëti 'ain. ² Min titami 'acësaribi oquin camina

nuibaquin xanu xënicama 'ësëti 'ain. 'Anan camina mìn chirabacëmi 'acësaribi oquin xanu xuntacucamaribi 'atimaquin sinánquinma upí oquin sinánquin 'ësëti 'ain.

³ Casunamëcë xanucama camina an ñu 'aquinti 'aíma 'ain, 'aquinti 'ain. ⁴ Usa 'aínbi ca xanu casunamëcënëx tuáñu 'ianan babañu 'icë aín tuábëtan aín baban 'aquinti 'icën, chamará 'icë ca aín papabëtan aín titan tëmëraquinbi nuibaquin tuá canioia, usa cupí. Usa 'ain camina uni 'imainun xanu, aín tita, aín papa 'imainun aín xubunu 'icë aín aintsicamaribi 'aquianan ñu 'axunti 'unánmiti 'ain. Usoquian 'ati ca Nucën Papa Dios cuëënia.

⁵ An ñu 'aquinti 'aíma 'ain ca xanu casunamëcënëx Nucën Papa Diosmishi catamëtia. Usa 'aish nëtënbi, imëbi ëníma abë banaquin ca Nucën Papa Dios raíri uni ñucáxunia. ⁶ Casunamëcë xanu axa xanu raíri 'aquinti sinanima, aín cuëëncësarishi 'icë, ax ca bamacëma pain 'aíshbi bamacësa 'icën.

⁷ Usa 'ain camina 'ën mi cacë banacama ënëxa quicësabi oía 'inun, axa Jesucristomi catamëcë unicama 'unánmiti 'ain, unían —aín aintsi 'ibu ca upí oquin 'aquinima —quixun ñuiti rabanan.

⁸ Uni 'imainun xanu Jesucristomi catamëcë 'ixunbia, an aín xubunu 'icëcama 'imainun aín aintsi 'ibucamaribi ami sinánquin 'aquincëma, ax ca Jesucristomi catamëcëmasa 'icën. Usa 'aish ca axa Jesucristomi catamëcëma uníxa 'icësamaira oi 'atimaira 'icën.

⁹ An ñu 'aquintia 'aíma 'ain ca xanu casunamëcë, axa Jesucristomi catamëcë unicaman 'aquinti 'icën. 'Aquincëxun ca atúinshia ñu 'axunun caínquinma, anribi axa Jesucristomi catamëcë

unicama 'aquinti 'icën. Usaquian 'anun aín anë quiricanu 'acë xanu, ax ca sesenta baritiañuma pan 'itima 'icën. Casunamëcëma 'aish achúshi bënëñuishi 'iá ca 'iti 'icën. ¹⁰ Upí oquian ñu 'aia unin 'unáncë ca 'iti 'icën. Cara aín tuá upí oquin canioxa, cara uni 'imainun xanu a isi aia upí oquin biaxa, cara axa Jesucristomi catamëcë unicama 'aquianxa, cara axa tēmëracë unicama chuámarua 'inun 'aquianxa, 'imainun cara uisa ñu upíribi 'axa quixun 'unáncë 'aish ca aín anë 'acë 'iti 'icën.

¹¹ Usa 'ain camina casunamëcë xanu xutani 'icë axa Jesucristomi catamëcë unicama an 'aquinun 'imitima 'ain. Usa xanux ca Jesúsmi manuti amiribishi bēnutisa tanti 'icën. ¹² Usari 'i ca —'ën cana axa Jesucristomi catamëcë unicama 'aquinti 'ai —quixunbi 'aquiníma 'uchati 'icën. ¹³ Ianan ca usa xanux ñu mēētisama tani chiquishi, bētsi bētsi xubunu atsínbēquinquin bana ñuibēquini niti 'icën. Nianan ca a ñuitima ñuribi ñuiti 'icën. ¹⁴ Usaía 'itima cupí cana cuēēnin, xutani 'aísha ax casunamëcë xanux ca bēnuti 'icën. Bēnutancëxun tuatancëxun ca aín tuá 'imainun aín xubunu 'icë ñucama upí oquin bērúanan, aín bēnëribi 'aquinti 'icën. Usaquian 'acëbë ca axa Jesucristomi sináncëma unicama a xanu ñui 'atimati banatima 'icën. ¹⁵ Usai 'iquinma ca casunamëcë xanu raírinën Nucën Papa Diosmi sinánti ënxun ñunshin 'atimanën 'apu Satanasñëan sinánmicësabi oquinshi 'aia.

¹⁶ Usa 'ain cana mi cain, bēbu 'imainun xanu axa Jesucristomi catamëcëcaman ca aín aintsi 'ibu casunamëcë 'icë upitaxa 'inun bērúanti 'icën, axa Jesucristomi catamëcë unicaman isa a bērúanun quixun sinánquinma. Usa 'aínbi ca axa Jesucristomi

catamëcë unicaman, an 'aquinti aín aintsi 'ibu 'aíma 'ain, xanu casunamëcë 'aquinti 'icën.

¹⁷ Aín cushían upí oquin 'aquincëxun ca axa Jesucristomi catamëcë unicaman ami sinánquin nuibaquin aín bana cuati 'icën. Usa 'ixun ca bëtsi 'acësamaira oquin an bana ñuixuanan upí oquin 'unánmicë, ami sinánquin nuibanan upíira oquin aín bana cuati 'icën. ¹⁸ Moisésnëan cuënëo bana ca quia: “Trigoma rëucubutanun amáquin piia quixun camina vaca bënë cuëtanitima 'ain”. Jesusaxribi ca ësai quiacëxa: “An ñu mëëxuncë uní a ca an ñu mëëmicë unin cupíoia”. Usaribiti ca an Nucën Papa Diosan bana ñuixuncë uní an aín cupí biti asábi 'icën.

¹⁹ Axa Jesucristomi catamëcë unicaman cushia, usai ca 'ia quixun uní achúshinën ñuia camina cuashiti 'ain. Rabë unían ñuia camina cuapánti 'ain. Rabë 'imainun achúshi unían ñuiaíra camina —asérabi ca —quixun 'unánti 'ain. ²⁰ Usa 'ixuan asérabi ënquinma 'aisama ñu 'aia camina axa Jesucristomi catamëcë unicama timëcënxun sinanatánun 'ësëti 'ain, usaquinmi caia cuaquian axa Jesucristomi catamëcë uní raírinën —'ënribi cana usaquin 'atima 'ai —quixun sinánun. ²¹ Nucën Papa Dios 'imainun Nucën 'Ibu Jesucristo 'imainun aín ángel upícamanribia ismainun cana ësáquin 'anun mí cain: Mí aintsi 'ibu 'imainun uisa uní cara, anbia axa Jesucristomi catamëcë unicaman cushi 'ixunbi ñu 'aisama 'aia camina axa Jesucristomi catamëcë unicama timëcënxun sinanamiquin cati 'ain, 'ën mí cacësabi oquin. ²² Upí oquin aín nuitu 'unánxunmaishi camina uní axa Jesucristomi catamëcë unicaman cushi

'imitima 'ain. Upí oquin pain uisa uni cara quixun istancëxun camina min mēcēn anu nanquin anēti 'ain. Isunmabi upíma uni anēaxbi camina usaribiti upíma 'iti 'ain. Usaquin ñu 'ati rabanan camina bērúancati 'ain.

²³ Min pucu 'aisama 'iquin camina 'unpáxēshi 'aquinma vino chamara 'unpáxcēñun mēscuxun 'ati 'ain.

²⁴ Uni raírínēan unēquinma ñu 'aisama 'aia ca a unicama policíanēn buáncēma 'aínshi unin isia. Isananbi ca uni raírínēnribi unēxun ñu 'aisama 'aiabia policíanēn a unicama buáncēbētan cuni unin 'unania. ²⁵ Usaribiquin ca unían ñu upíshi 'aia camabi unin isia. Usaquian iscēma 'aíshbi ca unían upí oquin 'acē ñu ax raíri unían 'unáncēma 'itima 'icēn.

6

¹ An uni ñu mēēxuncē uni, ax Jesucristomi catamēcē 'ixun ca an ñu mēēmicē uni ñuiquinma upíxuinshi ñu mēēxunti 'icēn, unían Nucēn Papa Díos ñuianan aín banaribi 'atimaquin ñuiti rabanan. ² A rabētaxbi Jesucristomi catamēcē 'ixun ca an uni ñu mēēxuncē unin —an ē ñu mēēmicē uni cana upí oquin ñu mēēxunima —quixun sinántima 'icēn. Usai 'iquinma ca an ñu mēēmicē uni axa Jesucristomi catamēcē 'aish aín nuibacē xucēnsa cupí, bētsi uni 'acēsamaira oquin ñu mēēxunti 'icēn. Usai 'inun camina camabi uni ñuixunquin 'unánmiti 'ain.

Jesucristomi catamēcē uni ñuñu 'iisa tani bēnētima bana

³ Ui unin cara unínbi sináncē bana uni 'unánmiquin Nucēn 'Ibu Jesucristonēn ñuicē bana,

anun uni iėti, a 'imainun an sinánmicëxuan
 aín unicamanribi ñuicë bana cuaisama tania,
 4 a unin ca rabiacaquinbi añu ñubi 'unáncëma
 'icën. Usa unin ca abë cuëbicanantishi cuëënquin
 —usama ca, ësaira ca bana 'icë —quixun raíri
 unicama cuëbicananquinia. Usai 'i ca a unicamax
 nutsianan, nishánanan, ñuianani 'atimati banaia.
 Usa 'ixun ca uinu 'icë unínbi ca aséribi bana ñuima
 quixun sinania. 5 Usa 'aish ca a unicamax usaíshi
 'iquin uisa ñu 'ati cara upí 'icë, uisa ñu 'ati cara
 upíma 'icë quixun 'unanima nētētima nishánani
 cuamianania. Usai 'icë unicaman ca Nucën
 Papa Diosan bana 'aquin isa unin curíqui biti
 'icë quixun sinania. A unicamabë camina nitima
 'ain. 6 Axa ñuñu 'iisa tani bēnētima Jesucristomi
 catamécë uni ax cuni ca upí oquin sinani cuëënia.
 7 Ñuñu cananuna bacëanma 'ain. Usaribiquin
 cananuna bamaquianquin uisa 'ixunbi nun
 ñucama buaniman. 8 Usa 'ain cananuna pitiñu
 'ianan chupañu 'aish cuëënquin 'aisamaira ñuñu
 'iti sinántima 'ain. 9 Axa 'aisamaira ñuñu 'iti
 cuëëncë uni a ca ñunshin 'atimanën 'apun ñu
 'aisama 'anun sinánmia. Sinánmicëxun ca a
 unicaman, uni sinánñuman 'acësaribi oquinshi
 'ati 'icën. Atúan usoquin sináncë cupí ca an
 'aisama ñu 'atishi sináncë unicamax, aín sinan
 ñancáishi 'aish xēnibua 'aínbi Nucën Papa Diosbë
 'itimoí bamanuxun 'aia. 10 Axa ñuñu 'ianan
 'aisamaira curíquiñu 'iti cuëëncë uni an ca
 masáquin sinan sinánquin, uisa ñu cara upíma
 'icë abi 'aisama sinánñu 'ixun 'aia. Usa 'ain ca
 raíri unin Jesucristomi sináncë 'ixunbi 'aisamaira
 ñu biti cuëënquin, Jesucristo manubianxun ñu
 'aisama 'aia. Usa 'aish ca masá nuituti nitsia.

Jesucristonan 'ixun ñu 'atima 'ati sinánquinbi tēnēti bana

¹¹ Uni raírínēan 'aisamaira ñuñu 'ianan curíquiñu 'iti cuēēncē cupí 'atima ñu 'acēbēbi camina mix Nucēn Papa Díosmi catamēcē 'aish atumi 'unánti 'ain. 'Unánquin camina upí sinánñu 'ixun Nucēn Papa Dios cuēēncēsabi oquin 'anan, ami catamēti unicamabē nishánanima nuibananan, uisa ñu cara 'icēbēbi bēnētima 'ianan, rabitima cuēmēninishi banati 'ain. ¹² Ñunshin 'atimanēan 'atimamitisa tancēxunbi tēnēquin camina Nucēn Papa Díosmi catamēcē 'ixun ax cuēēncēsabi oquinshi ñu 'ati 'ain. Usoquin 'atancēxmi xēnibua 'aínbi aín nētēnu abē 'inun ca an mi caísacēxa. Asérabi cana 'ēx usai 'i quíax camina 'itsa unían cuamainun quiacēn. ¹³ Nucēn Papa Dios, an camabi ñu unio, a 'imainun Jesucristo, Poncio Pilatonēn ñucácēxun chiquinaquin –'Apu 'inux cana uacē –quixun cá, ax cuēēncēsabi oquin cana mi cain, ¹⁴ Nucēn 'Ibu Jesucristo utēcēnti nētē 'itámainuan xēnibua 'aínbi uínbi min camina ñu 'atima 'acē quixun sinánti rabanan camina ñu 'aisama 'aquinma, 'ēn mi cacē bana bētsi oquinma ax quicēsabi oquinshi 'ati 'ain. ¹⁵ Aín nētēa sēnēncēbētan ca Nucēn Papa Dios, ax achúshishi 'icēa camabi unin ashi rabiti, 'ianan cushiira cushi 'aish, 'apucaman 'Apu 'ianan 'ibu-caman 'Ibu, anbi Nucēn 'Ibu Jesucristo utēcēnun xuti 'icēn. ¹⁶ Nucēn Papa Dios axēshi ca cēñutima usabi 'ia. Ax ca uíxbi bēbaquiantisama oquian pēcacē nēbētsi 'icēn. Uínu 'icē unínbi ca a isáma 'icēn. Istisama ca ax 'icēn, uínbi ca a isima. Ax cushiira cushi 'icē ca xēnibua 'aínbi camabi unicama 'imainun ángelcamanribi a rabiti 'icēn. Usaquin ca 'ati 'icēn.

¹⁷ Axa Jesucristomi catamēcē uni, 'itsa curíquiñu

'imainun 'itsa ñuñu 'icë camina ësaquin cati 'ain: Curíquiñu 'ixun camina —'ëx cana ñuñuira 'aish bëtsi unisama 'ai —quixun sinántima 'ain. Curíqui 'imainun ñucamaxribi ca nētēti 'icën. Usa 'ain camina min curíquimi catamëquin —uñbi ca 'ë uisoima, añu ñu carana 'aisa tani a cana 'ati 'ai —quixun sinántima 'ain. Usaquin sinánquinma camina Nucën Papa Dios an bamatimoi tsócë 'ixun, anun nux chuámarua bucunun camabi ñu nu 'inácë, amishi catamëti 'ain. ¹⁸ Canan camina ësaquinribi atu cati 'ain, ënquinma upí ñuishi 'anan ca uix cara ñuñuma 'aish 'aquinsa 'icë aribi ñonquinma 'aquínti 'icë quixun. ¹⁹ Usoquin 'acë 'aish ca ñuñu uni ax Jesucristonën 'acësaribi oquin sinácë 'aish ënë menuxun pain Nucën Papa Dios cuëenmitancëx, bamatancëxribi xëñibua 'aínbi chuámarua abë 'iti 'icën.

Ashia Pablonën Timoteo cá bana

²⁰ Timoteo, cana mi cain, bana itsi ñuixunquinma camina Jesucristo ñuicë banaishi bëtsi oquinma unicama ñuixunti 'ain. Jesucristo ñui quicë bana isa quixunbi ca bëtsi bëtsi unin asérabi a bana quicësa oquin ñuixunquinma bëtsi bana ñuía. A banax ca an ñu 'unácë unicaman asérabi isa quixun ñuicë 'aíshbi ñancáishi 'icën. A bana camina cuationa 'ain. ²¹ Raírinën ca a bana cuation Nucën Papa Diosmi sinánti ëanxa.

Nucën Papa Diosan nuibaquin mi 'aquinmainun ca bërúanx 'it. Ashi, Pablo.

**Nukën 'Ibu Diosan ain unikama 'inan ain
bana
New Testament in Cashibo-Cacataibo
(PE:cbr:Cashibo-Cacataibo)**

copyright © 2011 Wycliffe Bible Translators, Inc.

Language: Cashibo-Cacataibo

Translation by: Wycliffe Bible Translators, Inc.

Cashibo-Cacataibo

cbr

Peru

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cashibo-Cacataibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source files dated 29 Jan 2022

c8d73d75-386c-5f5e-a601-116dba3dae9b